

II – OSNOVNI PODACI IZ BIOGRAFIJE KARLA PARŽIKA

Karlo Paržik (Karel Pařík) (**Sl. I**), rodio se 5.VII 1857. godine (**Sl. I.a**) u Welišu (Veliš) kod Jičina u Češkoj (**Sl. I.b, I.c**).¹ Njegovi roditelji su bili Josef Pařík i Anna rođ. Slavík.² O njegovoj široj porodici, djetinjstvu i prvom školovanju ne nalaze se, zasad, detaljniji podaci.³ Paržik je održavao kontakt sa svojim rođacima u Jičinu i Napajedlu i povremeno odlazio u posjete.⁴ U Napajedlu je postojala i firma "Braća Pařík" koja se bavila izradom poljoprivrednih mašina, postavlkom instalacija plinovoda, parnih mašina, itd. (**Sl. I.d, I.e**).⁵

Građevinsku srednju školu (Baugewerbeschule) završio je u Beču⁶, a 1878. godine upisao se na Akademiju likovnih umjetnosti u Beču (Akademie der Bildenden Künste - **sl. II**), tj. na Specijalnu školu za arhitekturu koju je vodio arhitekt Theophil von Hansen.⁷

U toku školske godine 1878/79 pohađao je oba semestra, u toku 1879/80 samo prvi semestar, u toku 1880/81 oba semestra, a 1881/82 prvi semestar – ukupno šest semestara u periodu 1878-1882. Na kraju studija ocijenjen je kao dobar i marljiv student, a njegov uspjeh je bio pohvaljen.⁸

Nakon završenog studija, a može se pretpostaviti i u toku studija, Paržik je radio kao arhitekt i rukovodilac izgradnje kod neke građevinske firme u Beču⁹ do dolaska u Sarajevo u proljeće 1884. godine kada se prvi put nailazi na njegovo ime u zapisniku sa sjednice građevinskog odbora za izgradnju Vladine zgrade I (24. i 25. III.).¹⁰

Dakle, u periodu od oko deset godina (oko 1874-1884) Paržik se školovao i radio u Beču, te je izvjesno da su bečka arhitektura i školovanje imali uticaja na njegov kasniji rad.

¹ Podaci iz prijave mjesta boravka Karla Paříka od 3.XII 1912.g. (**Sl. 1.a**). Ovaj dokument i niz razglednica koje su pripadale porodici Karla Paržika nalaze se u privatnoj zbirci arhitekta Mehmedalije Telalbašića, te mu zahvaljujem na ustupanju dokumenata za potrebe ovog rada.

² Podaci iz rodnog lista prvog sina Karla Paržika koji se, također, zvao Karlo. Ovaj dokument nalazi se u privatnoj dokumentaciji Lidije Tanasijević iz Beograda, unuke arhitekta Karla Paržik i kćerke njegovog najstarijeg sina Karla. Zahvaljujem Lidiji Tanasijević na ustupanju ovog i drugih dokumenata, kao i na drugim informacijama korisnim za ovaj rad. Isti podaci navedeni su i u prijavi mjesta boravka Karla Paržika (**Sl. I.a**).

³ Istraživanja u arhivima van Jugoslavije nisu obavljena.

⁴ O ovom svjedoči nekoliko razglednica koje je Paržik poslao i u kojim pominje svoje posjete Jičinu i Napajedlu. (Zbirka razglednica M. Telalbašića.)

⁵ Fotografije iz zbirke M. Telalbašića.

⁶ ABH, ZVS-Prez., 1916, br. 3984.

⁷ Archiv Academie der Bildenden Künste, Ausgefertigte Zeugnisse Angefangen, VII-1877/78, VII-1880/81. Zahvaljujem dr Ibrahimu Krzoviću na ustupanju ovih podataka.

⁸ Isto.

⁹ ABH, ZVS-Prez., 1916., br. 3984.

¹⁰ ABH, ZVS-opšta građa, K. 15, br. 1.